

PERUTUSAN **YB MENTERI**



SALAM SEJAHTERA.

Saya amat berbesar hati untuk memperkenalkan Laporan Tahunan Suruhanjaya Syarikat Malaysia (SSM) bagi tahun 2022 yang melaporkan keseluruhan aktiviti dan pencapaian SSM pada tahun ini.

Tahun 2022 juga menandakan ulang tahun ke-20 penubuhan SSM. Sepanjang dua (2) dekad ini, SSM terus membina asas yang kukuh dalam memainkan peranan fasilitatif dalam usaha untuk memudah cara sektor korporat dan perniagaan melalui pelbagai fasa transformasi terutamanya pembaharuan perundangan dan juga dalam pendigitalan sistem penyampaian perkhidmatannya.

Tahun 2022 menyaksikan pelbagai cabaran kepada komuniti perniagaan sama ada di dalam negara mahupun di peringkat antarabangsa. Namun demikian, tahun ini juga merupakan tahun yang penuh dengan harapan apabila ekonomi global mula pulih daripada kesan pandemik. Langkah-langkah untuk memperkukuh asas-asas ekonomi dan merangsang potensi ekonomi domestik pasca pandemik menjadi sangat penting untuk menghasilkan pertumbuhan yang mampan dan inklusif dalam jangka masa panjang.

Komitmen Kerajaan ke arah pemulihan ekonomi pasca COVID-19 adalah selaras dengan Rancangan Malaysia Kedua Belas (RMKe-12), dengan pendekatan Menetapkan Semula Ekonomi sebagai salah satu teras utama, selari dengan keperluan Memacu Industri Strategik dan Berimpak Tinggi bagi Melonjakkan Pertumbuhan Ekonomi sebagai pemacu perubahan. Pada tahun 2022, SSM meneruskan penglibatan aktif dalam RMKe-12 yang menjadi tonggak penting dalam perjalanan menuju kepada Malaysia yang lebih inklusif, dinamik, dan berdaya saing, di mana kepentingan dan kesejahteraan rakyat diberikan keutamaan.

Penglibatan SSM dalam RMKe-12 ialah dalam Pelan Pelaksanaan Dasar (PPD) bagi Bab 5: Menangani Kemiskinan dan Membangunkan Masyarakat Inklusif. Dalam bab ini, usaha yang menyeluruh dan pelaksanaan yang bersepadu dalam menangani kemiskinan dan membangunkan masyarakat inklusif akan memandu Malaysia menjadi sebuah negara maju, inklusif dan makmur pada tahun 2030.

Selain itu, SSM juga terlibat dalam Mesyuarat Penyelarasan Strategi dan Inisiatif bagi Bab 7: Memperkukuh Pembangunan Sosio-ekonomi di Sabah dan Sarawak. Usaha yang sedang dilaksanakan oleh pihak-pihak yang terlibat termasuklah pelaksanaan kajian bagi proses-proses pendaftaran perniagaan bertujuan untuk meningkatkan kecekapan dan memudahkan lagi urusan menjalankan perniagaan.

Syarikat dan perniagaan digalakkan untuk memanfaatkan platform e-dagang dan memodenkan proses perniagaan melalui pendigitalan. Dalam memacu dan menyokong industri e-dagang di Malaysia untuk berkembang lebih pesat, SSM juga terlibat dalam Pasukan Petugas Pelan Halatuju Strategik e-Dagang Kebangsaan. Dalam kerangka Teras Strategik ke-6, SSM diberi mandat untuk menumpukan kepada aktiviti-aktiviti meningkatkan kesedaran kepada masyarakat bagi mendaftarkan entiti perniagaan, terutamanya yang menjalankan perniagaan dalam talian dan mempromosikan penggunaan SSM BizTrust sebagai salah satu kaedah utama untuk menentusahkan status sesebuah entiti perniagaan.

Melalui pelaksanaan inisiatif ini, SSM melalui produk SSM BizTrust mendukung hasrat kerajaan untuk mengembangkan ekonomi digital yang dilihat dapat membantu proses pemulihan ekonomi negara. Inisiatif ini merupakan usaha proaktif kerajaan untuk menjadikan e-dagang sebagai platform menjalankan perniagaan terpenting sekaligus berupaya memasarkan produk dan perkhidmatan dalam suasana perniagaan yang beretika. Sektor e-dagang kini terus berkembang dan telah menjadi sebahagian trend baharu masyarakat di negara ini.

Pemulihan ekonomi Malaysia kini kian mantap. Namun demikian, untuk memastikan pertumbuhan yang mampan pada masa hadapan, kita tidak boleh leka dan berpuas hati dengan pencapaian yang diperolehi. Peristiwa yang berlaku di seluruh dunia sejak beberapa tahun lalu adalah peringatan penting bahawa kita perlu merancang untuk menghadapi kejutan dan bersedia untuk bertindak balas dengan sewajarnya.

Sehubungan itu, Kementerian ini melalui SSM telah meneruskan pelbagai tindakan proaktif dengan melaksanakan enam (6) inisiatif dalam menyokong usaha-usaha Kerajaan mengurangkan impak yang dihadapi oleh sektor korporat dan ekonomi negara akibat pandemik COVID-19 serta memastikan perniagaan yang dijalankan terus berdaya tahan dalam persekitaran pasca pemulihan ekonomi.

SSM telah memperkenalkan inisiatif pengurangan kompaun sehingga 90% daripada nilai asal kompaun bagi semua kesalahan di bawah Akta Syarikat 1965 bermula 1 Mac sehingga 31 Disember 2022. Insentif ini merupakan inisiatif prihatin SSM untuk membantu syarikat yang sedang menghadapi masalah kewangan akibat pandemik COVID-19.

SSM juga meneruskan Skim Pendaftaran Perniagaan Prihatin (SPPP) yang memberikan pendaftaran perniagaan baharu secara percuma kepada usahawan kumpulan B40 dan pelajar IPT sepenuh masa.

Dalam usaha untuk memudah cara golongan orang kurang upaya untuk menceburi bidang perniagaan dan keusahawanan, SSM telah meneruskan pelaksanaan Skim 1 OKU 1 Perniagaan (S1O1P) yang menawarkan pendaftaran dan pembaharuan perniagaan secara percuma untuk satu perniagaan kepada individu dalam kategori kurang upaya.

Selain itu, SSM juga melanjutkan tempoh masa pendaftaran SSM BizTrust secara percuma sehingga 31 Disember 2022. Dengan mengadaptasi SSM BizTrust, keyakinan pengguna untuk berurusan dengan entiti perniagaan tersebut akan dapat ditingkatkan. Pematuhan entiti perniagaan terhadap keperluan-keperluan perundangan serta kesedaran di kalangan peniaga dan pengguna dalam berurus niaga secara beretika juga akan dapat ditingkatkan selaras dengan peningkatan adaptasi terhadap penggunaan piawaian-piawaian SSM BizTrust.

Dalam usaha-usaha menambah baik kerangka perundangan, SSM sedang memuktamadkan Rang Undang-Undang Syarikat (Pindaan) 2022 berkaitan Mekanisme Penyelamat Korporat dan Skim Kompromi

atau Perkiraan. Rang Undang-Undang Syarikat (Pindaan) 2022 ini bertujuan untuk memperkasa dan menambah baik kerangka perundangan sedia ada berkaitan rehabilitasi korporat untuk membantu syarikat-syarikat yang menghadapi masalah kewangan.

SSM juga sedang dalam proses menggubal Rang Undang-Undang Perkongsian Liabiliti Terhad (Pindaan) 2022 bagi memperkenalkan Mekanisme Penyelamat Korporat kepada entiti perkongsian liabiliti terhad yang menghadapi masalah kewangan agar kekal beroperasi dan dapat menjana ekonomi negara. Kedua-dua Rang Undang-Undang ini masih dalam peringkat kelulusan oleh Bahagian Gubalan, Jabatan Peguam Negara dan akan dibentangkan di Parlimen dalam sesi yang terdekat setelah mendapat kelulusan daripada Jabatan Peguam Negara.

Dalam usia penubuhan yang telah mencapai 20 tahun, SSM mempergiatkan usaha untuk memberi pendidikan dan kesedaran berterusan kepada semua pemegang taruh. Pendekatan pendidikan ini dipergiatkan dengan penganjuran Persidangan Kebangsaan SSM (SSMNC) kali ke-11 dengan tema '*Corporate Governance and Sustainability. Needed Now More Than Ever*' yang diadakan pada 26 hingga 27 Julai 2022. SSMNC tahun ini bermatlamat untuk memperkukuh tadbir urus dan kelestarian korporat dalam mencapai nilai jangka masa panjang serta pertumbuhan perniagaan yang mampan. Persidangan tahunan ini adalah lambang pendidikan kawal selia yang terunggul, wacana yang serius dan platform kepada kumpulan profesional dan korporat untuk terus kekal relevan dalam persekitaran perniagaan yang sentiasa berubah.

Pelaksanaan beberapa inisiatif yang saya nyatakan di atas hanyalah sebahagian daripada pelbagai inisiatif yang dilaksanakan SSM pada tahun 2022. Saya berharap, para pembaca akan dapat manfaat melalui maklumat-maklumat yang dikongsikan di dalam penerbitan ini.

Akhir sekali, saya percaya SSM di bawah seliaan dan bimbingan Anggota Suruhanjaya SSM dan kepimpinan Pengurusan Eksekutif bersama sokongan penuh warga kerja akan dapat mengharungi cabaran yang mendatang. Dengan usaha gigih dan semangat kebersamaan, kita mampu mencapai matlamat yang dihasratkan.

Saya yakin SSM akan terus berkembang menjadi pengawal selia dan pendaftar korporat yang lebih kukuh serta komited untuk bekerjasama dengan pihak berkepentingan bagi memastikan tadbir urus korporat syarikat-syarikat di Malaysia diperkukuh dan menarik pelabur asing dan seterusnya menjadikan Malaysia sebagai sebuah destinasi utama untuk menjalankan perniagaan. Saya percaya SSM akan terus melangkah maju untuk mencapai kejayaan yang lebih tinggi pada tahun-tahun akan datang dan terus teguh sebagai agensi pengawal selia yang kalis cabaran masa hadapan.

Terima kasih.

YB DATO SRI ALEXANDER NANTA LINGGI

Menteri Perdagangan Dalam Negeri dan Hal Ehwal Pengguna